



大清穆宗繼天開運受中居正保大定功聖智誠孝信敏恭寬  
毅皇帝實錄卷之三百二十

同治十年辛未九月癸卯諭內閣張之萬奏官犯乘閒脫逃  
請飭查拏並將疏防各員先行摘去頂帶等語已革浙江候  
補府經歷賴其勳前以詐稱知縣招搖生事經張之萬咨部  
斥革奏參審辦交長洲縣轉發代理縣丞王啟曾看管該革  
員欲赴素識之候補同知樊毓桂公寓王啟曾遂與偕行及  
至寓所樊毓桂他出遂在房東徐姓屋內暫歇該處與樊毓  
桂寓所相通該革員直入內室乘閒脫逃著張之萬咨行沿  
途及該革員本籍各該地方官嚴拏務獲儻該革員潛行來

都並著步軍統領衙門順天府五城一體查拏解赴江蘇歸  
案審辦。王啟曾於收管奏案官犯應如何小心看守乃竟任  
令脫逃。實非尋常疏忽可比。樊毓桂任令該革員潛匿內室  
因而脫逃。難保無先事豫謀情弊。該二員僅予摘去頂帶未  
免太輕。著改為革職。交該督撫嚴訊有無同謀賄縱情弊。即  
行據實參辦。○諭軍機大臣等。慶春奏派員設復臺站。並催  
馬隊保衛臺路一摺。察布察爾等臺阻滯。現經慶春派員馳  
赴賽爾烏蘇會同管站各員弁。趕緊招集設復。並攜銀雇覓  
駝隻。飭催馬隊馳往保衛臺路。扼賊東竄。即著慶春飭令色  
布什新泰等。趕將潰散之第三十八臺至第四十一臺。迅速

設復。一面催令大同官兵。及烏科兩城餉銀等項。依次起程。  
陸續前進。毋任中途逗遛。其餘附近各臺。亦當加意拊循。以  
臻妥善。轍德恩所撥馬隊。慶春已催令馳赴臺路。即著嚴檄  
該參領於所撥隊伍到臺後。妥為布置。遇賊即擊。以衛臺站。  
前因轍德恩兵力過單。諭令定安迅撥馬隊馳赴察布察爾  
一帶截剿。即著咨催該將軍趕緊派撥。將此由五百里諭令  
知之。○又諭。劉銘傳奏病難速痊。懇恩賞假回籍調理。並請  
派員接統淮軍各摺片。劉銘傳著賞假三箇月回籍調理。至  
請飭曹克忠來陝。統帶馬步各隊。本日已諭令李鴻章傳知  
該提督即行前往矣。甘省軍情緊要。曹克忠未經到陝以前。

劉銘傳仍當妥籌布置。不得以接統有人。遽行諉卸。俟曹克忠到陝。該提督再行回籍調理。以重防務。將此由四百里諭令知之。○又諭。本日據劉銘傳奏。病難速痊。請假離營。並請飭曹克忠赴陝接統淮軍等語。銘軍營數較多。素尚整飭。曹克忠現在天津。前經李鴻章奏稱堪備將材之選。自必知之有素。若令該員接統淮軍。是否相宜。如果實能勝任。卽著迅速奏明。派令赴陝。一面仍遵前旨。飭令來京陛見。至劉銘傳所稱。由平涼至肅州。轉運較難。擬分配馬步二十營。交曹克忠統率赴甘。至蘭州歸穆圖善會商調度。由甘涼相機前進。兵數較少。轉運稍易。以後該軍餉項。卽由李鴻章飭知後路。

撥歸西征糧臺。搭解蘭州。再由穆圖善派隊護運。其餘隊伍。或就地遣裁。或撤回兩江。酌量遣留等語。所籌各節。是否合宜。並著李鴻章妥籌奏聞。將此諭令知之。○兵部以武會試中額請。得旨。滿洲蒙古取中四名。漢軍取中三名。奉天取中一名。直隸取中十五名。陝西取中四名。廣東取中十三名。河南取中七名。山東取中九名。江蘇取中八名。安徽取中七名。山西取中六名。湖北取中四名。湖南取中四名。四川取中八名。廣西取中二名。福建取中五名。浙江取中七名。江西取中八名。雲南取中二名。貴州取中三名。○追予江西吉安陣亡知府陳宗元謚武烈。於江蘇吳江縣原籍建立專祠。○追予

江蘇各屬陣亡殉難紳民顧繼昌等暨婦女一千七百四名口分別旌卹如例。○甲辰諭軍機大臣等都察院奏廣西職員覃成典遣抱覃保桂以匪徒肆擾籲懇勦辦等詞赴該衙門呈訴據稱永安藤縣交界之滿村地方有匪首何先體及何中孚何七一等聚黨滋擾七年四月攻奪蚌蛇村經官兵往勦該逆竄回老巢外委庾應榮受賄通賊逆燄復張連攻村堡肆行殺掠等語此案前據馮子材康國器奏滿村等處股匪已飭都司盧殿清等帶兵前往勦辦當經諭令該提督等卽飭盧殿清等剋期攻勦茲覽所控各情匪徒擾害閭閻亟應迅速勦滅以靖地方著劉長佑馮子材速飭派出各軍

實力勦捕務將此股匪徒剋日殄滅毋稍稽延致令養癰成患並著查明外委庾應榮有無通賊情事從嚴懲辦以儆官邪將此由五百里各諭令知之。○又諭張廷岳奏帶兵大員貽誤戎機請旨查辦並帶兵回庫各摺片畢留圖廟內盤踞之賊不過八九百名自應悉力圍攻一鼓殄滅乃總管達爾濟輕聽賊匪投誠之言自懈防守並阻止伯克瓦齊爾等軍無須巡邏致令賊匪於九月初三日乘夜向西奔逸貽誤戎機實堪痛恨扎薩克齊默特多爾濟伯克瓦齊爾業經張廷岳摘去頂帶以示懲儆達爾濟輕妄縱賊厥咎尤重著先行摘去頂帶交奎昌榮全多布沁扎木楚杜嘎爾查明達爾濟

此次胎誤情形。從嚴參辦。以肅軍律。並著將被裏從逆之邢章解赴烏里雅蘇台城。交奎昌等嚴訊賊匪竄逸情形。據實具奏。現在賊匪竄向何處。張廷岳當飭伯克瓦齊爾等探蹤跟追。痛加勒洗。杜嘎爾亦當督飭各軍確偵賊蹤。會合夾擊。並著嚴飭達爾濟實力兜剿。毋令得容喘息。餘燼復然。張廷岳恐賊分股直犯庫倫。現已帶兵回庫。即著將防守事宜妥籌辦理。毋稍疏忽。賊股西竄。趨向靡定。著定安嚴飭各路防軍。遇賊即擊。毋形疏懈。其薩薩布所部馬隊。仍著催令星速前進。以資厚集。將此由五百里各諭令知之。○又諭。劉嶽昭。岑毓英奏。通籌全局。分路進剿一摺。滇省東南一帶未拔賊

巢。均距省城甚近。自應先行勦除。以去肘腋之患。大東溝尚未克復。馬如龍受傷未痊。深慮館驛賊匪出援。致成滋蔓。粵分田心及日者鄉進剿之師。亦未得手。岑毓英現已帶兵起程。親赴迪南督剿。可謂勇於任事。即著激勵各營。分投掃蕩。迅拔各巢。肅清東南一路。臨安府屬。既有賊巢數處。梁士美僅派隊駐紮通海曲江一帶。安坐府城。並不遵檄剿賊。漸形跋扈。岑毓英當設法駕馭。隨時約束。毋任如前驕恣。省城巡防事宜。暨接濟各路餉需軍火。著劉嶽昭悉心籌畫。不得稍有貽誤。另片奏。攻克永昌府城等語。永昌現既攻克。該處善後及防守事務。該督撫即飭在事各員妥為布置。乘勝進攻。

永平將未復各城次第收復。為直擣大理之計。岑毓英現赴  
迪南。所有迪西軍務。仍著妥籌兼顧。將此由六百里各諭令  
知之。○又諭總理各國事務衙門奏。奧斯馬加國換約屆期。  
請派員互換一摺。奧斯馬加國前立條約。聲明一年更換。現  
據該國使臣嘉理治呈遞照會。內稱即日赴滬候辦換約等  
語。著派恩錫將同治八年與奧國所立條約。妥為互換。其條  
約各本。俟李鴻章派員齎送至江蘇時。即著恩錫祇領。屆期  
前往上海辦理。恩錫於換約一事。向未經手。著曾國藩添派  
熟悉洋務大員。幫同辦理。以期妥協。本日諭旨一道。一併發  
往。如該使索看憑據。即著恩錫另行恭錄。給與閱看。俟換約

事畢。此旨仍繳還軍機處備查。將此由五百里諭知曾國藩。  
並傳諭恩錫知之。○河東河道總督蘇廷魁奏報秋汛安瀾。  
命詣

河神廟祀謝。賞道員成孚花翎。○以雲南克復麗江等城出  
力。予總兵官楊玉科以提督簡放。賞總兵官張松林一品封  
典。總兵官劉令集。副將萬如雲。呂鎮南。參將楊謙。遊擊蘇斯  
洋。蔣宗漢。劉重慶。都司楊桐。知府鍾念祖。巴圖魯名號。參將  
徐聯魁。知州程梁生等花翎。千總吳志遠等藍翎。餘加銜升  
敘有差。○旬到新疆。廣東。廣西。四川。福建。情實罪犯。停決新  
疆絞犯一人。廣東斬犯一人。四川斬犯四人。絞犯二人。餘四

寶錄卷三十一  
五  
十九人予句。○賑山東荷澤曹單定陶城武鉅野鄆城濟甯金鄉嘉祥魚臺汶上東平十三州縣被水災民。○乙巳諭軍機大臣等李鴻章奏練軍分起出口日期請飭察哈爾臺站防護弁兵互相援應並由庫倫多派駝隻迎引一摺古北口頭起官兵已於本月初六日出口其餘各哨每起百名開日前進賈吉齡亦親率中營於十二日赴口陸續進發即著李鴻章飭令該都司督率各起官兵迅速趲程接續前進毋稍遲誤李鴻章摺內現有探聞馬賊三四千餘由山後烏拉齊向東北分股竄擾圖謝圖汗地面距賽爾烏蘇較近等情該軍前赴庫倫必由賽爾烏蘇經過深恐附近有賊突至或致

疏失著慶春檄飭沿臺防護弁兵於該軍經過時互相援應並著張廷岳阿爾塔什達多派臚壯駝隻遴委得力員弁帶赴二三十臺處所沿站迎提導引以免遲滯此軍到庫後應如何分撥防勦張廷岳等務當妥為布置力保要區將此由五百里各諭令知之。○又諭定安奏遵撥馬隊前赴杜嘎爾軍營並解送烏科兩城軍餉等項應需經費及各營應賞皮衣均請飭部撥解銀兩各摺片薩薩布患病未能速痊既據定安奏稱並無捏飾著准其回旗調理其所部吉林黑龍江馬隊定安已飭侍衛永德帶隊先發並令副都統成山一軍由茂明安旗就近馳赴杜嘎爾軍營即著該將軍檄飭永德



成山等。星速前進合隊。以資厚集。毋稍稽延。口外氣候早寒。現屆秋深。朔風凜冽。所有沿邊一帶。駐紮各營兵勇。寒苦情形。實深塵繫。著准其援照上年成案。每兵勇一名。賞給皮衣銀一兩五錢。以示體恤。應需銀四萬一千餘兩。即著何璟於應解京餉內。如數酌撥。派員解赴歸綏糧臺。俾得及時放給。至烏科兩城軍餉軍火。及新疆各處餉銀。待用孔亟。定安所稱運送經費。無款可籌。亦係實在情形。著准其於山西應解京餉內。先撥銀一萬兩。即著何璟照數籌撥。就近解赴綏遠。以濟急需。將此由五百里各諭令知之。○旌表守正捐軀直隸衡水縣民曹立敬女廷姐。○丙午。諭軍機大臣等。神機營

王大臣奏。請整飭邊外臺站一摺。前因庫倫情形喫緊。察布察爾等臺官兵潰散。深慮官兵停滯中途。糧餉軍火。多致梗阻。疊諭慶春趕緊設復。又以榮全馳赴伊犁。於庫爾喀喇烏蘇迪西。如何設站安臺。接護轉運。諭令榮全等體察辦理。茲據該王大臣奏稱。邊外各路臺站。現擬分段責成。張家口外頭臺至八臺。專交察哈爾都統。自九臺以北。至烏里雅蘇台科布多各臺。分交各該盟長。自賽爾烏蘇至庫倫。自濟斯洪果爾至歸化城各臺。亦交各該盟長。按照定制。何臺應歸何旗管轄者。仍令該王公等自行經理。每臺連額設之數。以駱駝一百隻馬五十匹為定數。戈壁地內。不能用馬之處。即備

駱駝一百五十隻。如不敷用。應由幫臺辦事官員添雇。所需添雇價銀。准其報領。在臺供差官兵等應分別給予口分。仍由該將軍等稽查。遇有認真辦理或貽誤不齊等情。隨時奏請勸懲。至進取伊犁。應由何路前往。亟應設法安臺。官兵過境時。除照例支給外。並令蒙古旗戶。多備牛羊柴草。按照時價。賣給官兵。以資接濟。儻該官兵勒索陵虐。准其稟報該管之將軍等參辦。哈爾尼敦等處。勻撥官兵。分紮聯絡等語。著理藩院。定安。慶春。奎昌。榮全。多布沁。扎木楚。文碩。張廷岳。阿爾塔什達。按照該王大臣所奏詳細情形。悉心覈議。奏明舉辦。該將軍都統大臣等所屬蒙古旗界。應設之臺。向歸何旗

安設者。並著繪圖貼說。詳細奏聞。其應籌各臺經費。一併覈實奏請撥用。另片奏。榮全前赴伊犁。雖有路可通。第關內外正路未通。若以孤軍徑趨伊犁。亦非計出萬全等語。此時伊犁既不可置為後圖。而進兵之後。尤應豫籌久遠。著奎昌。榮全。多布沁。扎木楚。文碩。妥為覈議。奏明辦理。原摺片均著分別鈔給閱看。將此諭知理藩院。並由六百里諭令定安。慶春。奎昌。榮全。多布沁。扎木楚。文碩。張廷岳。阿爾塔什達知之。○丁未。諭內閣。鑲黃旗滿洲奏。原任杭州將軍瑞昌次子續承。查有下落。現由湖北巡撫派員護送到旗。一摺。續承著該旗帶領引見。○諭軍機大臣等。李瀚章奏。遵議湖南撤回勇丁。

借補行伍。無庸另定章程一摺。據稱該督自調任楚督後。曾仿照前辦湖南章程。將湖北省出師凱撤投標員弁。挑選精壯。練習弓馬。卽以技藝之優劣。定署補之先後。並酌給練習弓箭銀錢。以資生計。所有撤勇借補行伍。辦理有年。似無庸另議章程等語。兩湖凱撤員弁。既據奏稱。挑選補額。定有章程。卽著李瀚章。劉崐。按照舊章辦理。惟兩湖地方。年來匪徒屢次滋事。該督撫務當認真防範。督飭各該州縣。將團練保甲等事實力整頓。遇有不法之徒。隨時密拏嚴辦。以期消患未萌。將此各諭令知之。○又諭。蘇廷魁奏。趕堵侯家林缺口。並改築官隄一摺。據稱自蘭工決口後。黃水穿運而行。本年

八月初間。黃水異漲。復由侯家林將民埝衝成缺口。灌運入湖。若不亟籌堵築。恐來年大汛盛漲。沙泥俱下。河湖全塞。南路運道可虞。擬趁水落歸槽。趕將侯家林缺口堵合。沮河一帶民埝。一律改築官隄。現已派員赴工。先於口門盤做裏頭。免再刷寬。並將堵口築隄。擇節確估。奏請籌款興修等語。東南運道。關繫緊要。自應亟籌堵築。著喬松年。丁寶楨。按照所奏各節。詳加查勘。會商籌辦。應需款項若干。俟奏到後。再行籌撥。原摺均著鈔給閱看。將此各諭令知之。○又諭。劉長佑。馮子材奏。官軍圍剿竄匪。殲除首逆。並拏獲內地要犯一摺。越南匪首曾亞日。於王大股匪勒滅後。復糾黨竄踞上林社。

夷村。經馮子材飭令劉玉成等帶隊圍剿。立將賊首曾亞日及匪目黃汶廣等誘擒正法。股匪悉數殲除。惟賴安粘山東枚等處。踞匪尚多。卽著劉長佑、馮子材檄飭副將陳得貴督率所部勇丁扼紮北芹。迅速會同上林社各軍分道攻剿。一面咨會越南官兵層層堵截。務乘賊匪勢孤之時。迅將東路逆氛埽蕩。卽行轉戰而西。廓清夷境。毋稍稽延。內匪范三大、陳安瀟、籍隸欽州。暗向水東左結之賊。由賊中攜帶銀兩潛回原籍那天墟等處。並在西省上思州邊境招集無賴。帶赴水東。現經馮子材派弁前往欽州大寺汛地面會同該署把總黃紹功將陳安瀟拏獲正法。惟范三大聞風免脫。著瑞麟

劉長佑、馮子材嚴飭各該地方文武會同派出員弁一體嚴密查拏務獲毋任漏網。將此由五百里各諭令知之。○又諭。杜嘎爾奏追剿賊匪情形一摺。據稱達爾濟於八月十八等日在翁音河等處擊賊獲勝。與奎昌等前奏大略相同。惟畢留圖廟內盤踞之賊已據張廷岳等續報於九月初三日乘夜向西竄逸。此次杜嘎爾摺內所稱探聞賊匪擾及哈沙圖等站。旋於九月初二初四等日向西避竄。是否卽係畢留圖廟竄出賊股抑係另股之賊。著張廷岳查明具奏。達爾濟輕聽賊匪投誠之言。縱令已因之賊復行他竄。貽誤戎機。厥咎甚重。著奎昌、多布沁、扎木楚、杜嘎爾懍遵前旨查明實在情

形從嚴參辦。毋稍諱飾。杜嘎爾接奉疊次諭旨。自己趨程前進。著卽督飭所部。探明賊蹤。實力勒辦。毋任日久蔓延。張廷岳亦當督飭伯克瓦齊爾等會合兜勒。並將庫倫防務嚴密布置。以杜窺伺。昨據定安奏。薩薩布患病未痊。請假回旗。其所部馬隊。已飭侍衛承德。記名副都統成山。統帶前進。馳赴杜嘎爾軍營合隊。該副都統得此一軍。兵力較厚。本日據榮全奏。已於九月初四日起程。前赴伊犁。隨帶官兵。僅止百餘名。所有該署將軍前請由杜嘎爾軍營抽調吉林黑龍江官兵各五百名。令吉爾洪額。訥蘇肯。統帶前進。著杜嘎爾遵照前旨。迅速派撥。剋日前往。毋稍延緩。將此由六百里各諭令

知之。○又諭奎昌等奏。酌帶官兵起程。前赴伊犁一摺。俄人襲取伊犁。已四閱月。亟須大員前往經理。且轉瞬大雪封山。行途阻滯。自應迅速前進。以赴事機。榮全因所調官兵未集。現於烏里雅蘇台防守各營內酌量抽調百餘名。定於九月初四日起程。該署將軍膺茲鉅任。遠道遙行。所有一切機宜。卽著穩慎籌辦。隨時具奏。其後路糧運各事宜。著奎昌多布沁扎木楚。文碩。妥籌接濟。俾榮全得以壹意前進。不至瞻前顧後。前諭李鴻章。何璟。飭令口北道歸綏道各先辦糧十萬斤。由臺站解赴烏城。著嚴飭各該道趕緊如數籌解。並著定安。慶春。督催趨運。毋任遲誤。將此由六百里各諭令知之。○

以廣西欽州擒獲逆匪。予署把總黃紹功以千總用。並賞藍翎。○戊申。准山東在籍前任浙江衢州府同知陳述經重與恩榮宴。賞四品卿銜。○己酉。諭內閣。永存舒恆奏。請飭直隸各州縣買交兵米一摺。承德府應交兵米。向由各該州縣採運備放。現在存倉米石無多。除同治八年分秋冬季欠交兵米如數交齊外。其同治九年採買兵米。尚未交倉。兵食攸關。豈容延宕。著直隸總督嚴飭該府州縣迅速買運交倉。以供支放。前代理平泉州知州金齡。欠交咸豐十年兵米一千十二石零。仍著嚴催交齊。毋許再延。○庚戌。諭內閣。榮祿奏。查勘專案工程。請派員承修一摺。所有

泰陵

隆恩殿

寶城二項工程。著派本年承修另案工程之大臣延煦。桑春榮。敬謹承修。另片奏。續查出

和裕皇貴妃園寢內

恭順皇貴妃寶頂應修工程。著延煦等一併敬謹修理。○諭軍機大臣等。李鴻章奏。遵旨籌派曹克忠赴陝接統銘軍各摺片。曹克忠接統銘軍。既據李鴻章奏稱尚無不相宜之處。即著傳諭該提督迅速來京陛見。所請派令辦理肅州一帶軍務。准其專摺奏報之處。著俟曹克忠陛見後再降諭旨。原

實錄卷三十一  
摺片均著留中。將此由四百里諭令知之。○又諭德英、托克  
湍奏遵旨挑備官兵候調。並籌撥軍械一摺。據稱黑龍江備  
調馬隊官兵一千名。業經挑齊。聽候調遣。惟該省額設軍械  
現存無多。此次備調官兵應需軍械。請飭部撥給。抑或轉令  
該軍營籌給等語。著德英、托克湍查明該官兵應需何項軍  
械。每項應需若干。詳細開單具奏。再行飭部籌撥。其備調兵  
丁。並著檄飭派出各員認真操練。以資得力。將此由四百里  
各諭令知之。○又諭杜嘎爾奏遵旨商調伊犁馬隊。請撥餉  
銀數萬兩各摺片。榮全已於九月初四日起程。前赴伊犁。隨  
帶官兵僅百餘名。甚形單薄。昨諭杜嘎爾迅速撥兵前往。現

在薩薩布所部馬隊。已飭永德、成山帶赴杜嘎爾營中合隊。  
該副都統有此一軍。已足補榮全指調之數。亟應速籌派撥。  
著杜嘎爾懍遵疊次諭旨。抽調吉林黑龍江官兵各五百名。  
令吉爾洪額、訥蘇肯統帶赴伊。榮全業經起程。此項官兵自  
應剋日前進。不必往返咨商。致稽時日。杜嘎爾前由烏城軍  
餉內提銀九萬兩。發給官兵口糧。現僅存銀一萬數千兩。九  
月以後。不敷支放。據該副都統奏稱。擬於張家口所存應解  
烏城餉銀內。暫撥數萬兩交口北道。將該副都統管帶之吉  
林二三四起、黑龍江頭三四起、察哈爾五起。及訥蘇肯、福珠  
哩、貢果爾等兵丁應需餉銀。統由該道按月放給。並先籌兩

三箇月餉銀解赴該營等語。張家口如尚有應解烏城餉銀。即著李鴻章慶春查明撥給銀數萬兩。照該副都統所籌辦理。如張家口已無烏城存餉。仍著杜嘎爾咨商金順奎昌多布沁扎木楚。由烏城解到餉銀內籌撥。以資接濟。至該副都統請將烏城征兵糧餉責成口北道辦理之處。著李鴻章慶春斟酌情形。奏明辦理。將此由六百里各諭令知之。○句到奉天。陝西湖廣情實罪犯。停決奉天斬犯一人。陝西斬犯一人。絞犯二人。湖廣絞犯一人。餘五十二人予句。○辛亥句到浙江。江西安徽江蘇情實罪犯。停決江蘇斬犯一人。餘四十九人予句。○豁免湖南晃州廳被擾地方上年民欠錢糧。○

壬子引見原任杭州將軍瑞昌子閒散續承得旨。著以六部主事用。○賞五城貧民棉衣銀。○癸丑諭軍機大臣等。李鶴年奏。遵查李世忠在固始境老樓地方居住。築成一寨。附近又築四寨。寨內私藏槍礮。前數年曾有招留張總愚之叔張特賸。任柱之弟任汶。及息縣巨捻張昆情事。其鑄造小錢。擅殺平民各節。亦皆確實。請飭英翰妥速辦理。以申國法等語。國家仁育義正。一秉大公。李世忠既已保全於前。此時自不能追究既往。遽予刑誅。如現在實有招納叛黨。謀為不軌。實據。即應密速掩捕。明正其罪。以遏亂萌。曾國藩向有遠見。於李世忠平日行為。知之最稔。該革員現在舉動。想該督亦必



隨時查察。豫為之防。此事究應如何辦法。著斟酌機宜。密速覆奏。張特賸。任汶。張昆等。是否尚在李世忠寨中。抑已逃匿他處。卽著英翰就近密查。一面知照曾國藩。一面據實奏聞。此節為招集亡命確據。必應切實查明。以定罪狀。英翰於此事亦能隨處留心。並著與曾國藩密慎籌商。固不可有心文致。亦不可稍涉疏虞。此中操縱機宜。該督撫等諒必能籌畫盡善也。原摺均著鈔給閱看。將此由四百里各密諭知之。○以大理寺少卿龔自閔為光祿寺卿。○甲寅。

孝慈高皇后忌辰。遣官祭

福陵。○旌表守正捐軀山東鄒城縣民主盛恩妻趙氏。○乙卯。

諭內閣。御史恆忠奏。各旗拆毀官房。請飭查辦一摺。八旗設立官房。例應隨時整理。茲據該御史奏稱。東直門內西北一帶官房。自咸豐年閒起。陸續拆毀千餘間之多。該管各官。何以毫無覺察。鑲黃一旗如此。恐他旗亦所不免。著八旗都統。按照底冊。逐一查明。原有若干間。現存若干間。據實覆奏。並將失察之該管各官一併查參。經此次清查後。務須督飭該管官實力經理。儻再有拆毀。應如何責令該管官分成賠修之處。並著八旗都統會同步軍統領衙門妥議章程具奏。○又諭。劉崐奏。拏獲滋事首要各犯。訊明正法一摺。湖南益陽等處滋事。首逆劉道美。何春台二犯。經劉崐飭屬嚴拏。劉道

美潛匿益陽林子口白馬寺內。已革守備申大發帶領團勇馳赴該處。立將劉道美擒獲。其竄犯龍陽逆匪劉子訓。王友潰。亦經該撫飭屬緝獲。均已訊明正法。何春台一犯。仍著嚴緝務獲。毋任漏網。拏獲逆首之已革藍翎都司銜龍陽城守營守備申大發。著開復守備原官。並藍翎都司原銜。以昭激勸。已革益陽縣知縣黃應謨。辦理既多未善。被參後仍復不知愧奮。著不准留營。永不敘用。○諭軍機大臣等。前因馮子材奏廣西署太平府知府徐延旭貪劣不職各節。當經諭令劉長佑查奏。茲復據康國器奏。徐延旭統帶安定等六營。辦理邊徼防勦。當越南匪徒猖獗。該員所部勇丁。竟敢缺額。請

旨革職懲處等語。著劉長佑即將康國器所參徐延旭勇丁缺額情形。一併確切查明。據實具奏。毋稍徇隱。原摺著鈔給閱看。將此諭令知之。尋奏。徐延旭歷任要地。防勦有功。遵查被參各款。均無實據。得旨。徐延旭既查無營私舞弊等情。著無庸議。該撫仍當隨時察看。是否堪勝知府之任。毋稍徇隱。○以前任福州副都統富勒渾泰署鑲黃旗漢軍副都統。○上以孟冬時享。

太廟。自是日始齋戒三日。○丙辰。

孝敬憲皇后忌辰。遣官祭。

泰陵。○諭內閣。李鴻章奏。道員試署期滿。循例懇請實授一摺。

直隸津海關道員缺。卽著陳欽補授。仍賞加按察使銜。○又  
諭李鴻章奏。特參玩視捕務暨聲名平常之知縣。請分別摘  
頂革職一摺。直隸署東明縣知縣候補知州王崑厓。於該縣  
城內職員陳玉鋪戶被刦一案。並不趕緊查拏。猶以事主呈  
報不實。飾詞搪塞。致賊乘閒遠颺。實屬玩視捕務。王崑厓著  
摘去頂帶。暫行革職。勒限留緝。儻限滿無獲。卽行從嚴參辦。  
運同銜候補直隸州知州南和縣知縣裴福德。聲名平常。雖  
查無加派賣票實蹟。惟信用匪人。致招物議。實屬咎有應得。  
裴福德著卽行革職。以肅官方。○又諭瑞麟奏。查辦潮州府  
屬地方積匪。捕獲要犯。請將出力總兵獎勵一摺。廣東潮州

府屬潮陽等縣匪徒。搶擄械鬪。積案甚多。經該督派委總兵  
方耀。道員沈映鈐等。督帶兵勇。分投查辦。先後將惠來等處  
著名匪犯陳獨目。為。謝凍品。謝奉章。謝崑礪。鄭錫彤。及陳老  
仔汰等。緝獲正法。該郡賴以安謐。辦理尚屬奮勉。署潮州鎮  
總兵南韶連鎮總兵方耀。著交軍機處記名。遇有提督缺出  
題奏。其餘出力文武員弁官紳。並著由該督覈實保獎。毋許  
冒濫。其失察械鬪之各地方官。著加恩免其置議。仍著瑞麟  
督飭各屬。將善後事宜妥為籌辦。並嚴飭派出文武各員。認  
真抓捕餘匪。毋任漏網。以靖閭閻。○諭軍機大臣等。成祿奏。  
肅逆東竄。官軍堵截獲勝。並該逆分股出關情形一摺。肅回

東竄高臺撫彝一帶。經成祿派兵堵截。斃賊百餘人。復密飭  
兵勇遏其歸路。又斃賊數十名。該逆遁歸肅巢。分股出關。一  
向西竄往安敦玉等處。一由北套竄去。成祿現咨綏遠城將  
軍。檄飭各臺豫為堵禦。一面飛飭關外三營相機截剿。卽著  
該提督嚴飭各軍。勤加偵探。遇賊卽擊。保衛民生。毋稍疏懈。  
逆股既竄向北套。深慮擾及草地。復肆蔓延。著定安檄飭在  
防兵勇實力堵遏。並將阿拉善旗各臺站妥籌防範。毋稍疏  
虞。張曜現駐甯夏。並著分撥隊伍。確探賊蹤。攔頭截擊。盡殄  
逆氛。左宗棠仍催徐占彪迅赴肅州。將該處賊巢一律掃蕩。  
淨絕根株。庶關外地方不至再遭蹂躪。於大局實有裨益。將

此由六百里諭知左宗棠。定安。成祿。並傳諭張曜知之。○又  
諭文麟。景廉。伊勒屯奏。探聞怕夏已赴南路。烏魯木齊回情  
反覆。文麟。景廉奏。肅回出關滋擾情形各一摺。烏魯木齊逆  
首馬仲。如果真心向化。何以於文麟等發去諭紙後。久無回  
信。及孔才行抵昌吉。仍復率黨撲攻。其為詭詞乞撫。另蓄詭  
謀。已無疑義。文麟等務當督率各軍妥籌防剿。不得再行議  
撫。致為該逆所給。前因俄人代復伊犁。並有進規烏魯木齊  
之說。諭令景廉酌帶兵勇。規復烏魯木齊。免落他人後著。並  
令左宗棠由西征糧臺內。先行借撥銀十萬兩。迅解景廉軍  
營。俾應急需。現在該城回情反覆。亟應迅速進剿。以赴事機。

著景廉懷遵前旨。剋日帶兵起程。節節進取。將烏魯木齊及  
早收復。庶聲威較壯。鄰國不至生心。於大局實有裨益。怕夏  
不在吐魯番候信。遽赴南路。是其歸順之說。殊不足信。文麟  
等務當相機妥辦。不可墮其計中。如果真心投順。交出城池。  
屆時再由該大臣等奏明辦理。陝回大股。句結肅逆。出關滋  
擾。攻陷安西。協屬之布隆吉爾橋灣各堡。並攻撲安西。敦煌  
城池。雖經兵勇擊退。而賊股麇集。來去靡常。難保不時出肆  
擾。左宗棠前奏派徐占彪十二營前赴肅州。諒早拔隊西進。  
著飭該提督分撥隊伍。相機協勦。毋任該逆再行出關肆擾。  
並將肅州防勦事宜妥為籌辦。徐占彪到肅州後。成祿著卽

懷遵前旨。整隊前行。與景廉會合。規取烏魯木齊。毋稍濡滯。  
將此由六百里各諭令知之。○又諭。前因杜嘎爾奏。官兵口  
糧。九月以後不敷支放。請於張家口所存應解烏城餉銀內。  
暫撥數萬兩。並先籌兩三箇月餉銀。解赴該營。當諭李鴻章。  
慶春。查明撥給。如張家口已無烏城存餉。卽由杜嘎爾咨商  
金順。奎昌等。由烏城解到餉銀內籌撥。茲據慶春奏。張家口  
前存部撥烏城軍餉十萬兩。業已埽數提解出口。庫存並無  
烏城餉項。擬由杜嘎爾咨商金順。奎昌等。由烏城解到餉銀  
內籌撥。或由部撥。榮全軍餉銀十萬兩。內截留數萬等語。榮  
全帶兵前赴伊犁。規復各城。道路遼遠。此項餉需。關繫至為

實錄卷三百一  
十一  
緊要。杜嘎爾督隊勦賊。需餉甚迫。張家口既無存項。仍著杜  
嘎爾會商金順。奎昌等。由烏城解到餉銀。內如數籌撥。如烏  
城餉項一時短絀。亦無可提。著慶春於部撥榮全軍餉內酌  
量撥給。以應急需。仍由金順。奎昌等設法補解。榮全軍營以  
清款項。該將軍等務當通籌全局。審度緩急。會商辦理。不得  
稍分畛域。將此由六百里各諭令知之。○兩廣總督瑞麟奏。  
廣東現存釐廠。礙難裁撤。並嚴飭水陸官弁。整頓緝捕。以清  
盜源。得旨。現留各釐卡。既據奏明不能裁撤。該督務須慎選  
妥員。力減浮費。以杜弊端。至盜賊肆行。實為地方之害。該督  
亟應遴派明幹牧令。實力整頓。毋得一奏塞責。逸犯曾大鵠

幅等。仍著檄飭戴朝佐等。嚴拏務獲。淨絕根株。○以前任閩  
浙總督英桂為內大臣。○旌表守正捐軀直隸深州民高山  
妻种氏。山東陵縣民周永興妻胡氏。○丁巳  
上以孟冬時享

太廟。前期親詣行禮。○旌表守正捐軀河南新鄭縣民陳文妻  
李氏。○越南國使臣阮有立等三人於午門外瞻觀。

大清穆宗繼天開運受中居正保大定功聖智誠孝信敏恭寬  
毅皇帝實錄卷之三百二十

